

Na osnovu člana 16. stav 1. i člana 17. stav 2. Zakona o Vladi Hercegovačko-neretvanskog kantona („Službene novine HNK“, broj:3/07), a u vezi sa članom 18. Zakona o koncesijama („Službene novine HNK“, broj:2/03, 1/06), Vlada Hercegovačko-neretvanskog kantona je na 24. sjednici, održanoj 2.12.2008. godine, donijela

## **ODLUKA**

### **O UTVRĐIVANJU VISINE NAKNADA ZA KONCESIJE ZA EKSPLOATACIJU MINERALNIH SIROVINA NA PODRUČJU HERCEGOVAČKO - NERETVANSKOG KANTONA**

#### **I OPĆE ODREDBE**

##### **Član 1.**

Ovom Odlukom utvrđuju se kriteriji i metodologija za utvrđivanje naknada za koncesije (u daljem tekstu: koncesiona naknada) u postupku dodjele koncesije za eksploataciju mineralnih sirovina na području Hercegovačko-neretvanskog kantona.

##### **Član 2.**

Koncesiona naknada, koju je koncesionar obavezan platiti, sastoji se od :

- a) jednokratne naknade koja se obračunava i naplaćuje jednokratno pri zaključenju ugovora o koncesiji i predstavlja naknadu za pravo eksploatacije mineralne sirovine i
- b) tekuće (godišnje) naknade koja se obračunava za vrijeme eksploatacije mineralne sirovine i naplaćuje se za vrijeme trajanja ugovora o koncesiji.

#### **II JEDNOKRATNA NAKNADA**

##### **Član 3.**

Osnovica za utvrđivanje jednokratne koncesione naknade je ukupan projektovani prihod za vrijeme ugovora o koncesiji, ili ekonomska ocjena vrijednosti ležišta, utvrđena u revidiranom elaboratu o klasifikaciji, kategorizaciji i proračunu rezervi mineralnih sirovina.

Kao pokazatelj ukupnog projektovanog prihoda iz stava 1. ovog člana uzima se predstudija i/ili studija ekonomske opravdanosti za predmetnu koncesiju.

##### **Član 4.**

Vrednovanje pokazatelja iz člana 3. ove Odluke vrši Ministarstvo privrede.

Za obavljanje zadataka iz prethodnog stava ministar privrede može po potrebi formirati stručnu komisiju.

##### **Član 5.**

Utvrđena jednokratna koncesiona naknada ne može biti manja od 1,5% od ukupno projektovanog prihoda koji se planira od koncesione djelatnosti za period trajanja ugovora o koncesiji, odnosno ne može biti manja od 1,5% od ekonomske ocjene vrijednosti predmetnog ležišta mineralne sirovine.

#### **III TEKUĆA (GODIŠNJA) NAKNADA**

##### **Član 6.**

Osnovica za utvrđivanje tekuće (godišnje) naknade je ukupna količina iskopane mineralne sirovine u godini za koju se izračunava godišnja tekuća naknada (obračunska godina).

Tekuća (godišnja) naknada se izračunava na način da se ukupna količina iskopane mineralne sirovine izražene u m<sup>3</sup> ili toni čvrste mase pomnoži sa koeficijentom vrijednosti izraženom u konvertibilnim markama (KM).

Koeficijent vrijednosti iz stava 2. ovog člana (cijene) po pojedinim vrstama mineralnih sirovina utvrđuje ministar privrede za svaku godinu (najkasnije do 15. januara za tekuću godinu) posebnim aktom.

Ukoliko akt iz stava 3. ovog člana ne bude donesen u roku, do njegovog donošenja ostaje na snazi akt koji vrijedi za prethodnu godinu.

#### **Član 7.**

Konačno utvrđivanje tekuće (godišnje) finansijske obaveze koncesionara (srađivanje stanja) na osnovu utvrđivanja činjeničnog stanja izvršit će Ministarstvo privrede na kraju svake obračunske godine.

Za obavljanje zadataka iz prethodnog stava ministar privrede može po potrebi formirati stručnu komisiju.

#### **Član 8.**

U cilju utvrđivanja plaćanja tekuće (godišnje) naknade, koncesionar za svaku obračunsku godinu trajanja koncesije utvrđuje godišnji plan eksploatacije mineralne sirovine.

Na plan iz prethodnog stava Ministarstvo privrede daje saglasnost.

Ukoliko organ iz člana 7. ove Odluke na kraju obračunske godine srađivanjem utvrdi da je količina iskopane mineralne sirovine manja od količine utvrđene u planu iz stava 1. ovog člana, onda osnovica za obračun tekuće (godišnje) naknade ne može biti manja od 70% od količine utvrđene planom.

#### **Član 9.**

Tekuća (godišnja) naknada može biti i veća od naknade utvrđene na osnovu ove Odluke i akta iz člana 6. stav 3. ove Odluke, u slučaju kada u postupku javne ponude ponuđač sam ponudi veći iznos naknade, odnosno ako ugovorom o koncesiji ugovorne strane ugovore veću naknadu.

### **IV PRELAZNE I ZAVRŠNE ODREDBE**

#### **Član 10.**

Sve odluke o pristupanju dodjeli koncesije i odluke o dodjeli koncesije za eksploataciju mineralnih sirovina koje su donijete po Zakonu o koncesijama („Službene novine HNK“, broj:2/03, 1/06) po kojima još nisu sklopljeni ugovori o koncesiji, bit će usklađeni sa odredbama ove Odluke.

#### **Član 11.**

Ova Odluka stupa na snagu osmog dana od dana objavljivanja u „Službenim novinama Hercegovačko-neretvanskog kantona“.

Bosna i Hercegovina

Federacija Bosne i Hercegovine

HERCEGOVAČKO-NERETVANSKI KANTON

VLADA

Broj: 01-1-02-2462/08

Mostar, 2.12.2008. godine

PREDSJEDNIK

Srećko Boras